



Broj: 01-217/12
Vareš, 27.12.2012. godine

Na osnovu člana 8. i 13. Zakona o principima lokalne samouprave u Federaciji Bosne i Hercegovine ("Sl. novine Federacije BiH", broj 49/06), člana 8. Zakona o matičnim knjigama ("Sl. novine Federacije BiH", broj 37/12), tačke 11. Uputstva o načinu vođenja matičnih knjiga ("Sl. novine Federacije BiH", broj 63/12) i člana 22. tačka 2. Statuta Općine Vareš – prečišćeni tekst, broj 01-162/12 od 11.09. 2012. godine, Općinsko vijeće Vareš, na 3. sjednici održanoj 27.12. 2012. godine, donosi

ODLUKU

o određivanju jedinstvenog matičnog područja općine Vareš

Član 1.

Područje općine Vareš se određuje kao jedinstveno matično područje za sva naseljena mjesta na tom području.

Član 2.

Sjedište matičnog područja je Vareš.

Član 3.

Matična knjiga rođenih, matična knjiga umrlih, matična knjiga vjenčanih i matična knjiga državljana vode se kao jedinstvene knjige za sva naseljena mjesta na području općine Vareš.

Član 4.

Za naseljena mjesta koja su pripadala matičnim uredima Vijaka, Dabravine i Vareš podaci o rođenju upisuju se u jedinstvenu matičnu knjigu rođenih, a podaci o smrti upisuju se u jedinstvenu matičnu knjigu umrlih koja se vodi za matično područje Vareš.

Član 5.

Za naseljena mjesta koja su pripadala Matičnom uredu Okruglica, i dalje će se vršiti obnova nestalih ili uništenih matičnih knjiga u kojima će se izvršiti upis činjenice rođenja, zaključenja braka i činjenice smrti.

Član 6.

Ova odluka stupa na snagu osmog dana od dana objavljivanja na općinskoj oglasnoj tabli, a objavit će se i u Informativnom biltenu općine Vareš.

**PREDSJEDAVAJUĆI
OPĆINSKOG VIJEĆA**

Odluka objavljena na oglasnoj ploči Općine Vareš dana 28.12. 2012. godine.

OPĆINSKI NAČELNIK
Kovačević Avdija, dipl. pravnik

Obrazloženje

Odluke o određivanju jedinstvenog matičnog područja općine Vareš

1. Pravni osnov

Pravni osnov za donošenje Odluke o određivanju jedinstvenog matičnog područja općine Vareš sadržan je u odredbama čl. 8. Zakona o principima lokalne samouprave u Federaciji Bosne i Hercegovine ("Sl. novine Federacije BiH", broj 49/06) kojima je propisano da jedinica lokalne samouprave ima vlastite nadležnosti, ustanovljene ustavom i zakonom, i ima pravo baviti se svim pitanjima od lokalnog značaja koja nisu isključena iz njene nadležnosti, niti dodijeljena u nadležnost neke druge vlasti na osnovu ustava i zakona, te da u vlastite nadležnosti jedinice lokalne samouprave posebno ulazi osiguravanje i vođenje evidencija o ličnim stanjima građana i biračkih spiskova.

Prema čl. 13. istog zakona, općinsko vijeće, kao tijelo odlučivanja jedinice lokalne samouprave, u okviru svojih nadležnosti obavlja poslove utvrđene zakonom i statutom, dok je odredbom čl. 22. t. 2. Statuta Općine Vareš propisano da Općinsko vijeće u okviru svoje nadležnosti donosi odluke i druge opće akte kojima uređuje pitanja iz samoupravnog djelokruga Općine Vareš.

2. Razlozi za donošenje

Zakonom o matičnim knjigama ("Sl. novine Federacije BiH", broj 37/12) uređena su pitanja koja se odnose na nadležnost za vođenje matičnih knjiga, vrste i sadržaj matičnih knjiga, te druga pitanja koja se odnose na matične knjige u Federaciji Bosne i Hercegovine.

Tim zakonom propisano je da se matične knjige rođenih i matične knjige umrlih vode za svako naseljeno mjesto u sjedištu matičnog područja (čl. 8. st. 1.) s tim što gradsko odnosno općinsko vijeće može odrediti da se vode jedinstvene matične knjige rođenih i matična knjiga umrlih za više naseljenih mjesta, ako su ta mjesta prostorno povezana i olakšavaju efikasnije obavljanje tih poslova (čl. 8. st. 5.), matična knjiga vjenčanih vodi se kao jedinstvena knjiga za naseljena mjesta u kojima se vrši sklapanje braka (čl. 8. st. 4.), a matična knjiga državljana vodi se kao jedinstvena knjiga za područje cijele općine, odnosno grada (čl. 8. st. 3.).

Odredbom čl. 8. st. 2. Zakona o matičnim knjigama propisano je da se matična područja, kao i njihova sjedišta, određuju odlukom gradskog odnosno općinskog vijeća.

U Mjesnom uredu Vijaka (za naseljena mjesta Mižnovići, Ligatići, Očevića, Krčevine, Donja Vijaka, Gornja Vijaka, Radoševići i Ivančevo), matične knjige vođene su do 1993. godine, a 1994. godine prenesene su u Matični ured Vareš. U Mjesnom uredu Dabravine (za naseljena mjesta Planinica, Ostrlja, Slavin, Radonjići, Striježevo, Poljanice, Brda, Budoželje, Kadarići, Neprivaj, Kokošići, Dabravine i Pomenići), matične knjige vođene su do 1997. godine, kada su prenesene u Matični ured Vareš. U Matičnom uredu Vareš (za naseljena mjesta Borovica, Pogar, Kopjari, Mijakovići, Javornik, Ljepovići, Pržići i Stupni Do), matične knjige su neprekidno vođene.

U Mjesnom uredu Okruglica (za naseljena mjesta Blaža, Brgule, Čamovine, Čeće, Karići, Kunosići, Letevci, Okruglica, Pajtovići, Ravne, Rokoč, Seoci, Sršljenci, Šikulje, Toljenak, Zubeta, Žalja i Žižci) matične knjige su uništene 1994. godine tokom ratnih dejstava. Kantonalno Ministarstvo unutrašnjih/unutarnjih poslova donijelo je rješenje, broj: 08-04/1-13-1-5472/06-BM od 03.11. 2006. godine, o obnavljanju nestalih ili uništenih matičnih knjiga, i to matične knjige rođenih, matične knjige vjenčanih i matične knjige umrlih za mjesto Okruglica za godine od 1900. do 31.12. 1946. u kojima će se izvršiti upis činjenice rođenja, zaključenja braka i činjenice smrti, a Oglasom istog ministarstva, broj: 08-04/1-13-1-5472-1/06 od 17.11. 2006. godine, pozvani su stanovnici općine Vareš da se prijave u postupku obnove matičnih knjiga u kojima će se izvršiti upis činjenica koje su bile upisane u nestale ili uništene matične knjige. Obnova tih matičnih knjiga još uvijek traje.

3. Finansijska sredstva

Za donošenje i provođenje ove odluke nisu potrebna posebna finansijska sredstva.

Predlažem da Općinsko vijeće Vareš usvoji ovu odluku u navedenom tekstu.

**PREDLAGAČ:
OPĆINSKI NAČELNIK**

Hamdo Fatić

